

HODŽINI SAVJETI



(Ili borba za sekularnu državu...)

Ovih dana baš onako mazohistički uživam gledajući ova prestrojavanja na domaćoj političkoj sceni. Ponovo se potvrđuje ona nečija narodna poslovice koja kaže da "majmun radi što majmun vidi". Pa tako i ovi naši maj... pardon političari su od svog umijeća politike jedino savladali lekciju koja kaže da nikad nema tako dobrih prijatelja da se ne mogu prodati, a ni takvih neprijatelja sa kojima se ne može u vlast. Jer vlast je vlast. A ima mjesta i ona, čini mi se francuska predrevolucionarna izreka – promjena, pa makar i nagore... Nemojte me krivo shvatiti, niti koga žalim niti za koga navijam, već me sekira činjenica koju čini mi se vidi samo mali broj ljudi, a koja glasi da sve više i sve brže pretvaramo ovu našu BiH u pravu pravcatu teološku državu. Ono što je malo čudno, to moram priznati, jeste da u toj državi sve hodže nisu muslimani, ali kako je riječ o lijepoj nam Bosni sve je bilo i još uvijek je moguće, složićete se – ja mislim.

O čemu je dakle riječ? Pa o divnom običaju milih nam političara svih boja i konfesija da onako samouvjereno, *obamovski* rekla bih, dijele ono što se u narodu zovu hodžini savjeti... Ko nije familijaran sa ovim izrazom evo da pojasnim - to je ona situacija kada vam dotični samouvjereno i otresito otkriva toplu vodu, ujedno vas savjetujući da je plaho zdravo i poželjno tuširati se hladnom. On se, doduše, tušira toplom, ali zbog dobrog razloga, koji nam naravno neće reći. Ne bi ga razumjeli, pretpostavljam.

E tako novi učesnici u vlasti otkrivaju nam da Bosni, vjerovali ili ne, trebaju investicije!!!?. I to baš onako povelike. I da pod hitno trebamo napraviti autoputeve, i da pod hitno trebamo dovesti strane investitore, i da pod *bitno* moramo zaustaviti sistemsku korupciju (šta bi to tačno bilo nemam pojma al' zeznuto zvuči...), da pod hitno treba riješiti problem propalih preduzeća tipa *Konjuha*, i sve tako vodenije i sve tako toplije...

Ono što je uistinu tragično je to što ove hodže kao omadijani slušaju Bosanci i Hercegovci svih konfesija. I ne samo da slušaju, nego i aplaudiraju.

A ja mogu samo sa ovog mjesta zavapiti - nećemo teološku već sekularnu državu!!! Ali nešto mi se čini da nema baš ko da sluša ovaj moj vapaj.

Stoga ćemo, kao što rekoh na početku, do daljnjeg imati *Vlast(i)* koje nam mudro zbore da je najbolje biti bogat i zdrav - jer kad ste siromašni džaba vam što ste bolesni.

Ili tako nekako..... **B**

Aida Delić,
glavna i odgovorna urednica